



---

Broj: 01,02,03,03/11-05-1-108/13

Sarajevo, 11. 11. 2013.

## **IZVJEŠTAJ**

**O ZVANIČNOJ POSJETI PREDSJEDAVAJUĆEG PREDSTAVNIČKOG DOMA  
PSBiH DENISA BEĆIROVIĆA I ZAMJENIKA PREDSJEDAVAJUĆEG  
PREDSTAVNIČKOG DOMA PSBiH MILORADA ŽIVKOVIĆA REPUBLICI SRBIJI**

**7. novembar 2013.**

Na poziv predsjednika Narodne skupštine Republike Srbije Nebojše Stefanovića, predsjedavajući Predstavničkog doma Parlamentarne skupštine BiH Denis Bećirović i zamjenik predsjedavajućeg Predstavničkog doma Milorad Živković boravili su u zvaničnoj posjeti Republici Srbiji. U pratnji delegacije bili su: Zlatko Vukmirović, rukovodilac Sektora za odnose s javnošću, Jelena Rajaković, šefica Odjela za bilateralne odnose, i Damir Porobić, šef Kabineta predsjedavajućeg Bećirovića.

Tokom sastanka s predsjednikom Stefanovićem, predsjedavajući Predstavničkog doma PSBiH Denis Bećirović rekao je da se budućnost Bosne i Hercegovine i Srbije mora graditi na međusobnom poštovanju i uvažavanju.

Predsjedavajući Bećirović istakao je da su, u skladu s općim pravcima i prioritetima vanjske politike Bosne i Hercegovine, koje je utvrdilo Predsjedništvo BiH, bilateralni odnosi Bosne i Hercegovine i susjednih zemalja prioritet bh. vanjske politike, ali da u međudržavnim odnosima između Bosne i Hercegovine i Republike Srbije postoje otvorena pitanja koja zahtijevaju hitno rješavanje u budućim bilateralnim aktivnostima na političkom i ekspertskom nivou. To se, prvenstveno, odnosi na pitanja iz oblasti imovinsko-pravnih odnosa i utvrđivanja državne granice.

Bećirović je istakao značaj ekonomske saradnje, navodeći da najviši zakonodavni organi Bosne i Hercegovine i Srbije moraju biti u funkciji ekonomije i od izvršnih organa tražiti da u što kraćem roku potpišu nove sporazume i protokole koji treba da ojačaju ekonomske i druge veze između dvije države. On je naglasio potrebu da se usaglasi niz međudržavnih dokumenata među kojima su, uz ugovor o državnoj granici, najbitniji Ugovor o uređenju imovinsko-pravnih odnosa između Vijeća ministara BiH i Republike Srbije, zatim Sigurnosni sporazum između Vijeća ministara BiH i Vlade Republike Srbije, Sporazum o saradnji između Vijeća ministara BiH i Vlade Republike Srbije u kontekstu pristupanja Evropskoj uniji, Protokol o saradnji u traženju nestalih lica između Vijeća ministara BiH i Vlade Republike Srbije, Memorandum o saradnji između Ministarstva vanjske trgovine i ekonomskih odnosa BiH i Ministarstva poljoprivrede, trgovine, šumarstva i vodoprivrede Republike Srbije, te Memorandum o razumijevanju između Vijeća ministara BiH i Vlade Republike Srbije o ekonomskoj saradnji na trećim tržištima.

Zamjenik predsjedavajućeg Predstavničkog doma PSBiH Milorad Živković istakao je da je Srbija najveći partner BiH, te da je obostrano korisno da se veze intenziviraju i razvijaju. On je dodao i da treba raditi na stvaranju uslova za međusobno priznavanje diploma kako bi se olakšala komunikacija među mladim ljudima i stručnjacima.

Predsjednik Skupštine Srbije Nebojša Stefanović izrazio je zadovoljstvo što su odnosi Republike Srbije i Bosne i Hercegovine u stalnoj uzlaznoj putanji, čemu svakako doprinosi i intenziviranje veza između parlamenata dvije zemlje. On je istakao da je potrebno afirmirati pozitivne promjene u saradnji dvije zemlje, kao i pozitivne primjere unapređenja saradnje u cijelom regionu. Stefanović je rekao da su Srbija i Bosna i Hercegovina, pojedinačno, mala tržišta za privlačenje stranih investitora, razvoj turizma i slično, ali da zajedničkim nastupom prema trećim tržištima obje zemlje mogu u potpunosti razvijati svoj ekonomski potencijal. Predsjednik Stefanović prihvatio je poziv za uzvratnu posjetu Bosni i Hercegovini, a zajednička je ocjena da kontakte ubuduće treba ostvarivati i bez zvaničnih protokolarnih poziva.

Prilikom susreta delegacije Parlamentarne skupštine BiH s premijerom Republike Srbije Ivicom Dačićem istaknuto je da u rješavanju otvorenih pitanja između Bosne i Hercegovine i Republike Srbije treba preduzimati odlučnije korake, jer je to bitno za budućnost naroda i država, ali i za ukupnu stabilnost cijelog regiona.

Predsjedavajući Predstavničkog doma PSBiH Denis Bećirović pozdravio je dogovor o održavanju zajedničke sjednice Vijeća ministara BiH i Vlade Republike Srbije i dodao da očekuje da će ona doprinijeti otklanjanju otvorenih pitanja koja postoje između dvije zemlje. On je, također, rekao da je strateški interes Bosne i Hercegovine stabilna i demokratska Srbija te izrazio nadu da isti interes ima i Srbija kada je posrijedi BiH.

Zamjenik predsjedavajućeg Predstavničkog doma PSBiH Milorad Živković rekao je da su višestruke veze građana Bosne i Hercegovine i Srbije izvanredna osnova za svaki vid saradnje. On je izrazio očekivanje da će se u narednom periodu iskoristiti pozitivan trend u regionalnoj saradnji, a kontakti zvaničnika dvije zemlje dodatno intenzivirati.

Premijer Republike Srbije Ivica Dačić istakao je da otvorena pitanja između dvije zemlje treba rješavati bez odgađanja. Istakao je da probleme treba otklanjati sistematično uz istovremeni rad na jačem povezivanju ekonomija dvije zemlje i njihovom zajedničkom nastupu na trećim tržištima, prije svega tržištu Istoka i Rusije, ali i drugim. Predstojeću zajedničku sjednicu Vlade Srbije i Vijeća ministara BiH nazvao je historijskom, te dodao da je vrlo bitno da se na tom sastanku naprave pomaci bar u jednom dijelu otvorenih pitanja. Sagovornici su se saglasili da je bitno i dalje raditi na rješavanju utvrđivanja granične linije između dvije zemlje kao i na izradi i parafiranju niza međudržavnih sporazuma kojima će se urediti i unaprijediti ukupni odnosi Bosne i Hercegovine i Srbije.

Tokom službene posjete Republici Srbiji delegacija Parlamentarne skupštine BiH sastala se i s ministrom vanjskih poslova Republike Srbije Ivanom Mrkićem. Razgovaralo se o evropskom putu Bosne i Hercegovine i Srbije, otvorenim pitanjima i budućoj saradnji između dvije zemlje.

Tom prilikom rečeno je da nema ugovora i sporazuma koji čekaju ratificiranje u Parlamentarnoj skupštini BiH. Istaknute su brojne mogućnosti za daljnji razvoj odnosa između Bosne i Hercegovine i Srbije, a zemlje s prostora bivše Jugoslavije na međunarodnom planu zajedno mogu postići mnogo više nego ako nastupaju pojedinačno. Na isti način, zajedničkim nastupom privrednika moguće je ostvariti i veće ekonomske rezultate na trećim tržištima.

šefica

Odjela za bilateralne odnose

Jelena Rajaković

Dostaviti:

- Kolegiju Predstavničkog doma
- Kolegiju Doma naroda
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za međunarodne odnose i protokol

Kopija: Ministarstvo vanjskih poslova BiH